

# Carta Cha Xihna Ri Cha Tyaa Ra Apóstol Juan

---

Ñayiví chaa coo yo

**1** Ihya tyaá ndi tuhun cha cha iyó maa quivi cha quichaha tandíhi. Ta cuví chi tuhun cha chiñi ndi ta cha nyehe ndi chihin nuu ndi; vatyí nyehe ndi ta tiñ ndi chihin ndaha ndi. Ta ican tuhun ihya cuví tuhun cha chahá ñayiví chaa coo yo. <sup>2</sup>Ñayiví chaa ihya quetuví quivi quichi ra Cristo. Maa ndi nyehe ndi ta chahá ndi cuenda tuhun chi; ta sacotó ndi tuhun ñayiví chaa cha ma naa ca maa ihya chi ndo. Vatyí ñayiví ihya, nyaá chi chihin Sutu yo Nyoo, ta vityin tuví chi nu nyicú yo. <sup>3</sup>Nacatyí ndi chi ndo cha nyehe ndi ta cha chiñi ndi tacuhva na cu iin ri ndo chihin ndi, tari maa ndi, ndicha cuii vatyí iin ri cuví ndi chihin Sutu yo Nyoo ta chihin Sehe ra, ra Jesucristo. <sup>4</sup>Ta tyaá ndi tuhun ihya chi ndo tacuhva na coo tandíhi tusii iñi cha chahá Nyoo chi ndo.

**Nyoo, ñuhú ndichin cuví ra**

<sup>5</sup>Ican ihya cuví tuhun cahán ra Cristo chihin ndi. Ta chiñi ndi ta sacotó ndi chi ndo: Nyoo maa ri

ñuhú ndichin iyó nu nyaá ra. Ta ñahri cha ñaa iñi, (ñahri cha ña vaha yihí iñi ra cuví cuan). <sup>6</sup>Tatu catyí yo vatyí iin ri cuví yo chihin ra, soco sacuví yo cha ña vaha, nu ñaa iñi chicá noo yo cuví cuan. Sandaví ñaha yo. Ta ñahri tuhun ndicha cahán yo. <sup>7</sup>Soco tatu nu ndichin iyó yo, tari maa Nyoo iyó ra nu ndichin, tyicuan ta iin ri cuví yo chihin tahan yo, ta niñi ra Jesucristo Sehe Nyoo, nacatyá chi ndii cuii maa cuatyí yo.

<sup>8</sup>Tatu catyí yo vatyí ñahri cuatyí yo, suri chi maa yo sandaví ñaha yo, ta ñahri cha ndicha nyaá añima yo. <sup>9</sup>Soco tatu nahmá yo cuatyí yo nuu Nyoo, yihí iñi yo chi ra vatyí vaha ra ta ña sandaví ñaha ra, soco sacuví ra cuhva catyí ra, ta cusaha ra ticahnu iñi cuatyí yo ta cusandachi ra ndii cuii maa cha quiñi caa yo. <sup>10</sup>(Nyoo catyí ra tyi iyó cuatyí yo), ta tatu catyí yo vatyí ñahri cuatyí yo, sahá yo tuhun tyi Nyoo, cuendu ra. Ta tuhun cahán ra, ñahri maa nyaá añima yo.

**Ra Cristo cuví ra cahán chaha yo**

**2** Sehe nyihi, sacoté tuhun ihya chi ndo, tacuhva ma sacuvi

ndo cuatyí. Soco tatu chicoꝝ cuatyí minoo ndo, ma yuhvi ndo, vatyí iyó ra cahán chaha yo nuu Nyoo. Ta ican ra cuví ra Jesucristo, ra vaha.

<sup>2</sup>Ta maa ra cuví ra chahnyá cuatyí yo, vatyí chihí ra tyiño nuu yo cha cuenda cuatyí yo. Ta ñima cha cuenda maa ri maa yo, soco cha cuenda tandihí ñáyiví.

<sup>3</sup>Tatu quichahá yo tuhun cahán Nyoo, ñohó nuu yo chi ra. <sup>4</sup>Soco tatu noo ra catyí ra: “Yuhu, ñohó nui chí Nyoo”, soco tatu ña quichahá ra tuhun cahán ra, cuví ra noo ra cuendu. Ta ñahri tuhun ndicha caá ñanima ra. <sup>5</sup>Soco ñu naquehén vaha tuhun cahán Nyoo, ican ñu cuan cuví ñu cuñí chi ra chihin cha ñi ñanima ñu. Ta cha tyicuan caa chitó yo tyi ñin ri cuví yo chihin ra. <sup>6</sup>Yóo cha catyí vatyí ñin ri cuví chihin Nyoo, tahán chi coo ra tari cuhva chiyo maa ra Jesucristo quívi chicá noo ra siqui ñuhu ñayiví.

#### **Tuhun chaa cha cuñí yo chi tahan yo**

<sup>7</sup>Yañi yo, ñima noo tuhun chaa sacoté chi ndo, soco cuví chi noo tuhun chahnu cha chitó ndo nyata quívi xihna ri. Ta ican tuhun chahnu ihya cuví tuhun chiñí ndo.

<sup>8</sup>Soco tari noo tuhun chaa cuví chi. Ta sacuví ra Cristo, ta chahá ra cha sacuví tucu maa ndo ñandihí. Ta cha tyicuan caa, cha ñaa ñi cuahan nocuee chi. Ta cha ndichin Nyoo cha sandundichín chi.

<sup>9</sup>Ñu cha catyí vatyí nyaá ñu nu ndichin, ta ña cuñí nyehe ñu chi tahan ñu, ni nyaá ca ñu nu ñaa ñi.

<sup>10</sup>Ta ñu cuñí chí tahan, nu ndichin nyaá ñu. Ta ñahri maa cha cuví

sanacava chí ñu nu cuatyí. <sup>11</sup>Soco ñu cha ña cuñí nyehe chí tahan, nu ñaa ñi nyaá ñu. Ta ña chitó ñu nya ityí cuahan ñu vatyí ña cuví nyehe ñu vatyí tari cha cuaa ñu.

<sup>12</sup>Sacuhín tuhun ihya chí nyoho, ra cuatyaa sehi. Vatyí cha yaha saha Nyoo ticahnu ñi cuatyí ndo cha cuenda cha chihí ra Jesucristo tyiño nuu ndo. <sup>13</sup>Ta chí nyoho, cha cuví ndo sutu, sacuhín tuhun ihya chí ndo, vatyí ñohó nuu ndo chí ra iyó nyata cumañi cacu ñuhu ñayiví. Ta chí nyoho, ra tyivaa, sacuhín tuhun ihya vatyí cuví chasaha ndo chí ra ña vaha.

Ta chí nyoho, cha cuví ndo ra cuatyaa sehi, sacuhín tuhun ihya vatyí ñohó nuu ndo chí Sutu yo Nyoo. <sup>14</sup>Sacuhín tuhun ihya chí nyoho cha cuví ndo sutu, vatyí ñohó nuu ndo chí ra cha iyó nyata cacu ñuhu ñayiví. Ta sacuhín tuhun ihya chí nyoho ra tyivaa vatyí nyaá xaan fuerza chí ndo. Ta tuhun Nyoo caá ñanima ndo. Ta cuví chasaha ndo chí ra ña vaha.

<sup>15</sup>Ma cuñi ndo cha quiñi caa cha iyó ñayiví ihya. Ni ma cuñi ndo cha iyó siqui ñuhu ñayiví. Vatyí ñu cuñí tandihí ihya, ña cuñí ñu chí Nyoo. <sup>16</sup>Vatyí tandihí cha iyó ñayiví ihya, cha ña vaha cha quichi cuvi ñi coño ñuhu yo, ta cha nyehe yo ta quichi cuvi ñi yo coo chí yo, ta cha cuñi yo cuyaa yo chihin cha iyó chí yo, tandihí ihya ñima cuhva chahá Sutu yo Nyoo chí yo cuví, soco maa maa ri cha chahá ñayiví ihya cuví. <sup>17</sup>Ta ñayiví ihya cuahan sandihí chí, chihin tandihí cha quiñi caa cha quichi cuvi ñi ñáyiví. Soco ñu cha sacuví cuhva cuñí Nyoo, tyicuan ri maa cuacoo ñu chihin ra.

### Ra xaan iñi chi ra Cristo

<sup>18</sup>Sehe nyihi, cha nyaá yo nu cuandihi quivi. Ta nyoho chiñi soho ndo vatyí vachi noo ra cha ña cuñi nyehe chi ra Cristo, ta vityin cha cuaha xaan ra ña cuñi nyehe chi ra Cristo iyó vityin. Yucuan chaha nacoto yo vatyí cha nyaá yo nu cuandihi quivi. <sup>19</sup>Maa ra nu nyicú yo quita coyo ra, vatyí ñima ra cuenda yo cuví chi ra. Vatyí tyehe ta ra cuenda yo cacuví chi ra, candoó ra chihin yo. Soco cuahan coyo ra tacuhva quetuvi vatyí ña tandihi ñáyivi ta cuenda yo cuví ñu.

<sup>20</sup>Soco chi nyoho chaha ra Cristo Tatyí Ii Nyoo cunyaa añima ndo. Ta chitó ndo tandihi. <sup>21</sup>Sacuhín tuhun ihya chi ndo ñima cha cuenda vatyí ña chitó ndo cha ndicha, soco vatyí chitó ndo. Ta ni noo cuendu ma quita cahan ñu sacuví cha ndicha.

<sup>22</sup>¿Yóó cha cuví ñu cuendu? Ñu catyí vatyí ra Jesus ñima ra Cristo cuví ra. Ta ñu cha catyí tyehe caa, ñu xaan iñi chi ra Cristo cuví ñu. Vatyí ña chinó iñi ñu chi Sutu yo Nyoo, ta ni ri chi ra Jesucristo Sehe Nyoo. <sup>23</sup>Tandihí cuí ñu ña chinó iñi chi Sehe Nyoo, yori Sutu yo Nyoo nyaá chihin ñu. Soco ñu catyí vaha chi ñáyivi vatyí ra Jesucristo cuví Sehe Nyoo, iin ri cuví ñu chihin Nyoo ñandihí.

<sup>24</sup>Yucuan chaha nyoho, tuhun cha chiñi ndo nya quivi xihna ri, naquehen vaha ndo chichi añima ndo. Tatu ndoó chi chichi añima ndo, iin ri cuví ndo chihin Sehe Nyoo ta chihin Sutu yo Nyoo ñandihí. <sup>25</sup>Ta ra Jesucristo catyí ra vatyí cuhva ra noo ñáyivi chaa cha ma naa ca maa coo yo.

<sup>26</sup>Sacuhín tuhun ihya chi ndo cha cuenda vatyí cuaha xaan ra sandaví ñaha chi ndo iyó. <sup>27</sup>Soco ra Jesucristo chaha ra Tatyí Ii Nyoo cha cunyaa añima ndo, ta ña chiñuhú ca cha sañaha ni noo ñáyivi chi ndo. Vatyí suri maa Tatyí Ii Nyoo sañahá chi ndo ndii cuí maa tuhun. Ta cha ndicha cuví, ñima cuendu cuví. Yucuan chaha sañihí ca ndo cu iin ri ndo chihin ra Cristo tari cuhva sañahá Tatyí Ii Nyoo chi ndo.

<sup>28</sup>Ta vityin nyoho, ra cuatyaa sehi, cuinyaña yo chi ra Cristo tacuhva vatyí nachaa chi quivi quichi ra, ma cutucu cuñi yo chihin ra. Ta tyicuan caa tucu maa ra chihin yo. Ta siin ri tacuhva cha ma tahan yo ticahan nuu nuu ra quivi quichi ra. <sup>29</sup>Cha chitó ndo vatyí ra Cristo vaha ra. Chitó tucu ndo vatyí tandihí ñu cha nyacuví cha vaha, sehe Nyoo cuví chi ñu.

### Ñu cha cuví sehe Nyoo

**3** Nyehe ndo, yoso cha cuñi Sutu yo Nyoo chi yo, vatyí nasaha ra sehe ra chi yo. Ta catyí ra: “Nyoho, sehi cuví chi ndo.” Yucuan chaha ñáyivi, ña cuñi nyehe ñu chi yo vatyí tyicuan caa tucu, ña cuñi nyehe ñu chi maa ra. <sup>2</sup>Yañi, vityin cha cuví yo sehe ra. Soco ta coto ca yo yoso caa cucuvi yo. Soco chitó yo vatyí nachaa chi quivi quichi ra Jesucristo, cucuvi yo tari maa ra, vatyí cunyehe vaha yo chi ra tari cuhva caá ra. <sup>3</sup>Ta tandihí yo cha nyatú yo cha cucuvi tyehe caa, nducú yo cuhva ta sandundí ca yo añima yo, tari ndii maa Sutu Mañi yo Jesucristo.

<sup>4</sup>Tandihi ñu sacuví cuatyí, ña quichahá ñu ley Nyoo. Vatyí cha sacuví yo cuatyí, ña quichahá yo ley Nyoo cuví chi cuan. <sup>5</sup>Cha chitó ndo vatyí ra Cristo quichí ra ñayiví tacuhva tinyaa ra cuatyí yo, ta maa ra ñahri cuatyí ra. <sup>6</sup>Tandihi yo cha ñin ri cuví yo chihin ra, ña sacuví yo cuatyí. Soco ñáyiví cha sacuví cuatyí, ta quehen cuenda ca ñu chi ra, ni ta cohon ca ra añima ñu. <sup>7</sup>Sehe luhli, ñaha sandavi ñaha ñáyiví chi ndo, vatyí ñu cha sacuví cha vaha, vaha ñu, tari maa ra Cristo vaha ra. <sup>8</sup>Soco ñu cha sacuví cuatyí, cuenda ra ña vaha yihí ñu. Vatyí ra ña vaha sacuví ra cuatyí nyata quiví xihna ri. Soco yucuan chaha quichí ra Jesucristo, ra cha cuví Sehe Nyoo, tacuhva vatyí satani ra ndíi cuii cha sacuví ra ña vaha.

<sup>9</sup>Tandihi yo cha cha yaha nacacu chaa yo, nanduví yo sehe Nyoo, ta ña sacuví ca yo cuatyí, vatyí ñayiví Nyoo iyó yo. Yucuan chaha ña sacuví ca yo cuatyí, vatyí cha yaha nacacu chaa yo ta sehe Nyoo cuví chi yo. <sup>10</sup>Ta tyehe caa cuví nichon nuu yo chi ñu cha cacuví sehe Nyoo, ta ñu cuví sehe cuihna. Vatyí yóo ñu sacuví cha ña vaha o ña cuñí nyehe ñu chi tahan ñu, ñima ñáyiví cuenda Nyoo cuví ñu.

#### Na cuñí yo chi noo noo tahan yo

<sup>11</sup>Vatyí ican ihya cuví tuhun cha chihí ndo quiví xihna ri: Cha cuñí yo chi noo noo tahan yo. <sup>12</sup>Ña tahan chi sacuvi yo tari cuhva sacuví ra Caín. Cuví ra noo ra cuenda ra ña vaha. Ta chahñí ra chi yañí ra. ¿Ñáá tuhun chahñí ra chi

ra? Cha cuenda vatyí vaha cuhva sacuví yañí ra, ta maa ra Caín chinyacuví ra cha ña vaha.

<sup>13</sup>Yañí yo, ma iyo cuñí ndo tatu ña cuñí nyehe ñáyiví chi ndo. <sup>14</sup>Yoó chitó yo vatyí tari minoo ra chihí ta nandoto cuví yo vatyí iyó yo noo ñayiví chaa vatyí cuñí yo chi tahan yo. Ñu cha ña cuñí chi tahan, tari quiví ni cuví ca ñu tari noo ra chihí, ta ta nandoto ca ñu. <sup>15</sup>Yóo ñu cha xaan iñí chi tahan, tari noo ñu chahñí ñáyiví cuví ñu. Ta chitó ndo vatyí ni noo ñu chahñí, ma cuhva Nyoo ñayiví chaa cha ma naa ca maa coo añima ñu. <sup>16</sup>Nicohón nuu yo ñáá cha cuví cha cuñí yo chi tahan yo vatyí ra Jesucristo sañaha ra chi yo. Vatyí maa ra cuñí ra chi yo, ta chaha ra ñayiví ra cha catyí yo. Ta tyicuan caa tucu maa yo, cuñí yo chi tahan yo ta cuhva yo ñayiví yo cha cuenda ñu. <sup>17</sup>Ta tatu yihí yo iyó chiin chi yo siqui ñuhu ñayiví ihya, ta nyehé yo cumañí cha cumañí chi tahan yo, ta sahá ri yo cha ña nyehé yo, ¿atu cuñí yo chi Nyoo cha sacuví yo cha tyicuan caa? Ña cuñí yo chi ra cuví chi cuan. <sup>18</sup>Ra cuatyaa sehi, ñima chihin tuhun yuhu ri yo, cuñí yo chi tahan yo, soco na cuñí yo chi ñu chihin cha sacuví yo tumañí iñí, ta chihin cha ñí iñí yo.

#### Yoso caa sacuvi yo ta coo vaha yo chihin Nyoo

<sup>19</sup>Tatu sacuví yo tyicuan caa, chitó yo tyi yihí yo tuhun ndicha. Ta vaha iyó yo chihin Nyoo. <sup>20</sup>Tatu chichi añima yo ta tuví iñí yo tyi iyó cuatyí yo, vihi ca cuví Nyoo, chitó ra cha caá añima yo. <sup>21</sup>Yañí,

tatu tuví iñi yo tyi ñahri cuatyí yo, ma yuhvi cuñi yo nyehe yo chi Nyoo. <sup>22</sup>Ta ñáá ri cha cacan tahvi yo cuacuhva ra chi yo, vatyí quichahá yo tuhun cahán ra, ta sacuví yo cuhva tahán iñi ra. <sup>23</sup>Ta ican ihya cuví tuhun chahá ra chi yo: Cha chíno iñi yo vatyí ra Jesucristo cuví Sehe ra. Ta cha cuñi yo chi noo noo tahan yo vatyí tyicuan caa tuhun cha chahá ra chi yo. <sup>24</sup>Ta ñu cha quichahá tuhun chahá ra chi yo, iyó ñu cha iin ri cuví ñu chihin ra, ta maa ra iyó ra chichi añima ñu. Ta cha cuenda Tatyí Ii ra cha chahá ra chi yo, chitó yo vatyí nyaá ra chihin yo.

#### Tatyí Ii Nyoo ta tatyí ña vaha

**4** Cuñí xain chi ndo, yañi. Ma chino iñi ndo tandihí ñáyivi cha catyí tyi cuenda Nyoo cahán ñu. Nyehe xihna ndo tatu nacachí tahan cha cahán ñu chihin tuhun Nyoo. Vatyí cuaha xaan ra cha catyí vatyí Nyoo sañahá chi ra. Soco ña ndicha. <sup>2</sup>Soco tyehe caa cuví nichohon nuu ndo tatu Tatyí Ii Nyoo sacahán chi ra o ñima. Tandihí ra cha catyí vatyí quichí ra Jesucristo nya gloria ta cacú ra chihin coño ñuhu ñáyivi ihya, ican ra cuan, sacahán Tatyí Ii Nyoo chi ra. <sup>3</sup>Soco ndii cuii maa ñáyivi cha catyí vatyí ra Cristo ña chicá noo ra chihin coño ñuhu ñáyivi ihya, ñima Nyoo sacahán chi ñu cuan, soco tatyí ña vaha, cha xaan iñi chi ra Cristo, ican sacahán chi ñu. Cha chíni ndo vatyí nyaá quichi cuan. Ta vityin cha chicá noo chi síqui ñuhu ñáyivi.

<sup>4</sup>Ra cuatyaa sehi, ñáyivi chi Nyoo cuví ndo. Ta cuví chasaha ndo chi

ra xaan iñi chi ra Cristo. Vatyí cahnu ca ra Cristo, ra nyaá añima ndo ta ñima ca ra ña vaha, ra cha chicá noo síqui ñuhu ñáyivi ihya. <sup>5</sup>Maa ñu cuan, ñu cuenda ñáyivi ri ihya cuví ñu. Yucuan chaha cahán ñu tuhun ñáyivi ihya. Ta ñu cuenda ñáyivi ihya tyasohó ñu tuhun cahán ñu. <sup>6</sup>Soco yoó cuví yo ñu cuenda Nyoo. Ta ñu cuenda Nyoo tyasohó ñu tuhun cahán yo, soco ñu yihí tatyí ña vaha añima, ña cuñí ñu tyasoho ñu. Ta tyicuan caa cuví nichohon nuu yo chi ñu yihí Tatyí Ii Nyoo ta ñu yihí tatyí ña vaha.

#### Nyoo cuñí xaan ra chi tandihí ñáyivi

<sup>7</sup>Yañi yo, na cuñi yo chi tahan yo, vatyí Nyoo sañahá ra chi yo yoso caa cha tahán chi cuñi yo chi ñu. Tandihí yo cha cuñí yo chi tahan yo sehe Nyoo cuví chi yo, ta ñohó nuu yo chi Nyoo. <sup>8</sup>Soco ñu cha ña cuñí chi tahan, ta cohon nuu ca ñu chi Nyoo, vatyí Nyoo cuñí xaan ra chi yo ta chi tandihí ñáyivi. <sup>9</sup>Ta sañaha Nyoo vatyí cuñí ra chi yo chihin cha chahá ra noo Sehe mañi ra tyi quichí ra síqui ñuhu ñáyivi ihya, vatyí cuhva ra noo ñáyivi chaa coo yo. <sup>10</sup>Nyehe xihna, yoso cha cuñí Nyoo chi yo. Ñima vatyí xihna ca yo cuñí yo chi ra, soco xihna ca maa ra cuñí ra chi yo. Ta tachí ra chi Sehe ra vatyí tacuhva cúvi ra tyiño nuu yo ta cahnya ra cuatyí yo.

<sup>11</sup>Nyoho yañi, tatu cuñí Nyoo chi yo cha tyicuan caa, tahán tucu chi cuñí maa yo chi tahan yo. <sup>12</sup>Vasi ni nonga ñáyivi, ta nyehe ca ñu chi Nyoo, soco tatu cuñí yo chi noo noo tahan yo, Nyoo nyaá ra añima yo. Ta tyicuan caa ni vaha iñi yo cuñí

yo chi ra. <sup>13</sup>Ta chitó yo vatyí nyaá yo chichi ndaha ra, ta maa ra nyaá ańima yo vatyí chaha ra Tatyí li ra cunyaa ańima yo. <sup>14</sup>Ta nyuhu nyehe vaha ndi ta cuví ndi cha ndaa vatyí Sutu yo Nyoo saquichí ra chi Sehe ra tacuhva vatyí sacacu ra chi yo cha cuví yo ñáyivi iyó siqui ñuhu ñayiví. <sup>15</sup>Tandíhi ñu nachinó ińi chihin cha ñi ińi ñu ta catyí ñu vatyí ra Jesús cuví ra Sehe Nyoo, Nyoo nyaá ra chichi ańima ñu. Ta maa ñu nyaá ñu chichi ndaha ra.

<sup>16</sup>Ta yoó cha nacoto yo ta nachino ińi yo tyi Nyoo cuńi ra chi yo, ta chi tandíhi ñáyivi. Ta ñu cha cuńi chi tahan, chichi ndaha Nyoo nyaá ñu. Ta Nyoo nyaá ra chichi ańima ñu. <sup>17</sup>Vatyí tatu cuńi yo chi Nyoo chihin cha ñi ińi yo ma yuhvi cuńi yo nyehe yo chi ra, nachaa chi quivi cutuńi chi tandíhi ñáyivi nuu ra. Vatyí tari cuhva iyó maa ra Jesucristo, tyicuan caa iyó yo siqui ñuhu ñayiví ihya. <sup>18</sup>Nyoo cuńi ra chi yo, ta tatu cuńi yo chi ra, ñahri maa cha yuhví yo. Tatu ñi ińi yo cuńi yo chi Nyoo ña nuńa ca nu quíhi tuhun yuhví ańima yo, vatyí Nyoo tavá ñehe ra tandíhi maa cuan. Vatyí tatu yíhi cha yuhvi cuńi yo, yíhi cha cuenda vatyí iyó cuatyí yo. Ta yuhví yo cha cutachi tuńi Nyoo chi yo. Vatyí tatu yuhvi cuńi yo, yuhví yo vatyí ña cuńi vaha yo chi Nyoo.

<sup>19</sup>Yoó cuńi yo chi Nyoo vatyí xihna ca maa ra cuńi ra chi yo. <sup>20</sup>Tatu yoó cha catyí: “Yuhu cuńi chi Nyoo”, catyí ñu, soco ña cuńi nyehe ñu chi tahan ñu, noo ñu cuendu cuví ñu. Vatyí tatu ña cuńi nyehe ñu chi tahan ñu cha nyehé

ñu, ¿atu cuví cuńi ñu chi Nyoo cha ña nyehé ñu? Ma cuví. <sup>21</sup>Ta Nyoo chaha ra tuhun ihya chi yo: Ñu cha cuńi chi Nyoo, tahan chi cha cuńi tucu ñu chi noo noo tahan ñu ñandíhi.

#### Cha ñi ińi yo chinó ińi yo chi Nyoo sahá ganaa yo chi cha ña vaha

**5** Tandíhi ñu chinó ińi tyi ra Jesús cuví Cristo cha saquichí Nyoo, sehe Nyoo cuví chi ñu; ta tatu cuńi yo chi noo sutu, cuńi tucu yo chi tandíhi sehe ra. <sup>2</sup>Tatu cuńi yo chi Nyoo ta sacuví yo cha catyí ra, chitó yo vatyí cuńi tucu yo chi ñu sehe Nyoo. <sup>3</sup>Vatyí cha cuńi yo chi Nyoo ican cuví cha quichahá yo tuhun chaha ra chi yo. Ta tandíhi tuhun cha chaha ra chi yo ña yí sacuvi yo. <sup>4</sup>Vatyí tandíhi yo cha cuví yo sehe Nyoo, cuví chasaha yo chi cha ña vaha cha iyó ñayiví ihya chihin cha chinó ińi yo chi Nyoo. <sup>5</sup>Ñu cha chinó ińi vatyí ra Jesús cuví Sehe Nyoo, ican ñu cuan cuví chasaha chi cha ña vaha cha iyó ñayiví ihya.

#### Tatyí li Nyoo cuví cha ndaa cuenda ra Jesús ra cuví Sehe Nyoo

<sup>6</sup>Ra Jesucristo quichí ra siqui ñuhu ñayiví ihya. Ta chitó yo tyi ndicha cha Sehe Nyoo cuví chi ra nu condutya ra, ta nu chatí ñińi ra ñandíhi. Nima noo ri nu condutya ra. Soco nu chatí ñińi ra ñandíhi. Ta Tatyí li Nyoo cuví cha ndaa tyi tyicuan caa cuví. Ta maa ri cha ndicha cahán Tatyí li Nyoo. <sup>7</sup>Iyó uńi tahan testigu cha nyaá andívi: Sutu yo Nyoo ta ra Cristo ra cuví Tuhun Cahán Nyoo, ta Tatyí li Nyoo.

Ta nduñi tahan ihya cuví noo ri, ta iin ri cuhva cahán nduñi tahan. <sup>8</sup>Ta iyó uñi tahan testigu siqui ñuhu ñayiví ihya: Tatyí li Nyoo cha nyaá añaima yo catyí vatyí ican ra Jesús cuví Sehe Nyoo. Yucuan cuví noo. Ta nu condutyá ra Jesús, Nyoo catyí ra vatyí ican ra cuví Sehe ra. Yucuan cuví cha cu uvi. Ta nu chati ñiñi ra Jesús, yucuan cuví cha cu uñi cha sañahá chi vatyí ra Jesucristo cuví ra Sehe Nyoo. Ta tyicuan caa nduñi tahan cuan iin ri cuhva cahán. <sup>9</sup>Yoó tuhvá yo naquehen yo tuhun cahán ra cuví testigu siqui ñuhu ñayiví ihya. Soco Nyoo cahnu ca cuví ra ta ñima ca ra ñuhu ñayiví ihya. Ta ican ra catyí ra vatyí ra Jesús cuví Sehe ra. <sup>10</sup>Ñu cha chinó iñi tyi Sehe Nyoo cuví chi ra Jesús, chitó ñu chichi añaima ñu tyi ndicha. Ñu cha ña chinó iñi chi ra, tari quiví cha sahá ñu tuhun tyi Nyoo ra cuendu cuví ra, vatyí ña cuñí ñu chino iñi ñu cha cahán Nyoo tumañi iñi cuenda Sehe ra, ra Jesús. <sup>11</sup>Ta ican ihya cuví tuhun cahán Nyoo chihin yo: Catyí ra tyi chahá ra noo ñayiví chaa coo yo tatu chinó iñi yo vatyí ra Jesucristo cuví Sehe ra. <sup>12</sup>Ñu cha nyaá Sehe Nyoo añaima, iyó ñu ñayiví chaa ihya. Ta ñu cha yori Sehe Nyoo nyaá añaima, ñahri ñayiví chaa cuan iyó ñu.

**Nu ndihí cahan ra Juan ta chahá ra tuhun chi ñu**

<sup>13</sup>Sacuhín tuhun ihya chi nyoho cha chinó iñi chi ra Jesús Sehe Nyoo, tacuhva coto ndo tyi cha iyó ndo ñayiví chaa cha ma naa ca maa.

<sup>14</sup>Cunyeé xaan iñi yo chi Nyoo vatyí chitó yo vatyí tatu chicán yo cha chicán yo chi ra ta cuhva cuñí ra cuví, maa ra chiñí ra tuhun cahán yo. <sup>15</sup>Ta tatu chitó yo tyi chiñí ra tuhun cahán yo, chitó tucu yo tyi cha ñihí yo cha chicán yo chi ra.

<sup>16</sup>Tatu nyehé yo noo ñu tahan yo sacuví ñu noo cuatyí, soco noo cuatyí cha ña sacunaá chi chi ñu nuu Nyoo, cuví cacan tahvi yo chi ra cha cuenda ñu. Ta cusaha ra ticahnu iñi cuatyí ñu tacuhva coo ca ñu nuu ra. Soco iyó noo cuatyí cha sativí chi ñáyivi nuu Nyoo. Ña tahán chi cacan tahvi yo cha cuenda ñu cha sacuvi cuatyí cuan. <sup>17</sup>Tandihí cha ña vaha cha sacuví ñáyivi, cuatyí cuví. Soco iyó cuatyí cha ña sativí ndihí chi chi yo nuu Nyoo.

<sup>18</sup>Chitó yo vatyí ñu cha nacacu chaa saha Nyoo, ña sañihí ñu sacuvi ñu cuatyí. Vatyí Sehe Nyoo sahá cuenda chi ñu ta ña chahá ra cha tiin ra ña vaha chi ñu.

<sup>19</sup>Ta yoó chitó yo tyi cuenda Nyoo yihí yo. Tandihí ca ñáyivi, cuenda ra ña vaha yihí ñu, vatyí nyacá ñaha ra chi ñu.

<sup>20</sup>Chitó tucu yo vatyí cha quichi Sehe Nyoo. Ta chahá ra cha chiñi tuñi vatyí cohon nuu yo chi Nyoo, ra ndicha vaha. Ta nyaá yo chichi ndaha ra cuví cha ndicha, ra cuví Sehe Nyoo, ra Jesucristo. Ican ra cuví Nyoo cha ndicha, ican ra cuví ñayiví chaa cha ma naa ca maa.

<sup>21</sup>Nyoho ra cuatyaa sehi, saha ndo cuenda chi ndo chihin cha sacahnú ñáyivi, ta ni ñima Nyoo cuví.

Ta na cuví chi tyicuan caa.